

湖南褒忠錄初稿



湖南褒忠錄初稿

殉陣四

謚威壯贈提督銜鄖陽鎮總兵瞿騰龍

奉勅贈都司銜守備瞿廷豹鎮守鎮標千總詹榮純

附

瞿騰龍字在田先世陽湖人曾祖明誠任永定縣尉僑寓湖南
因家焉騰龍幼孤隨母姚氏依外王父永定都司國印居常德
長遷善化爲善化人年十九入提標爲兵由常德協外委歷拔
至郴州汛千總猺逆趙金龍反堵剿出力賞戴藍翎再赴廣
東剿辦排猺賞五品頂戴尋遷鎮守備同平未陽土匪乾
州苗變率師焚其巢賜孔雀翎題補古丈坪都司明年署鎮
守遊擊咸豐改元出師粵西駐營武宣縣疊敗賊於桐木馬鞍

山適患瘧疾力疾殺賊大帥勸之息不可曰賊勢如此騰龍敢
愛身乎八月賊竄永安州追勦至古排塘屢斬賊目焚其巢擢
參將二年二月永安州復賊竄桂林騰龍繞道出賊前駐師桂
林文昌門賊攻文昌門扛棹覆濕絮其上爲擋牌騰龍以磚石
擊卻之旋用火焚賊呂公車賊氣沮遂解圍敍功授永綏協副
將 賞莽阿巴圖魯勇號賊竄楚境奉委至衡永長沙議防堵
事宜回次衡州禦賊於甯遠耒陽永興安仁皆捷及賊犯長沙
奉檄馳援遂率卒入城爲遊兵備緩急賊屢用地雷轟城皆以
堵擊得完十月十八夜五鼓魁星樓側地雷復發城圯十餘丈
騰龍率眾堵擊斬悍賊三百餘人城復完明日圍解加總兵銜

遂由岳州追賊至武昌三年正月賊棄武昌下騰龍入城安民
詔授湖北鄖陽鎮總兵金陵陷率師由九江安徽會江西大營
進勦旋以賊蔓延青豫

詔率兵二千赴河南山東抵高郵州節帥琦善奏詔之會總

兵雙來中礮死遂兼統雙營並總理營務翼長瓜洲賊援揚州
時所部皆分防各隘麾下僅五百人騰龍曰賊十倍我非力戰
軍且盡令曰今日之役有進無退敢有回顧者斬遂下馬持大
刀督陣麾下五百人奮勇衝殺呼聲震天五盪五決斃賊無數
入夜雷雨交作乘電光冒雨衝突賊不辨我兵多寡遂大亂自
相砍殺天明賊退屍骸枕藉所斃近三千人時八月一日也越

數日瓜洲賊由三汊河揚帆而來登東岸聲言報復騰龍率眾
渡河橫截之賊敗走十一月二十七日揚州復乘勝並復儀徵
四年二月三日進剿瓜洲破其伏次日復敗之初五日督師深
入賊傾巢迎敵分股襲其後騰龍被圍力戰死之年六十有四
同亡者遊擊以下十五人鎮筸鎮千總詹榮純與焉事聞 贈
提督銜 給祭葬 予諡威壯從祀昭忠祠騰龍雖武人所至
有仁聲去郴州千總曰合州老幼焚香祖送在軍愛恤士卒紀
律嚴明予輔廷從九品廣善藍翎從九廷熊藍翎外委廷豹藍
翎把總奉 頒 諭 縣 共 金 刻 印 奉 冊 冊 內 有 廷 豹 會 玉 西 大 尊
旨均賞給守備至旌昌三平五民娘寨旌昌石鰲嶺人姓廷豹

瞿廷豹號蔚堂騰龍季子入長沙協爲馬兵同出師廣西 賞
藍翎軍功尋入貲爲把總騰龍敗賊於瓜洲廷豹皆從騰龍陣
亡服闋後入江南營隸都統德興阿麾下充營官八年八月二
十日賊犯浦口力戰遇害 贈都司銜廕卹如例

詹榮純鳳凰廳人鎮筸鎮標騎卒道光時從征廣東 賞藍翎
新甯之變追剿至廣西修仁縣上思村賊回竄新甯踞金峯嶺
隨提督向榮擒其渠授本標額外咸豐元年向榮征粵充哨長
遷外委明年春賊逼楚奉飭防永州再赴粵助剿跟追至全州
傷簑衣渡之役帶傷鏖戰者三日八月賊擾醴陵譚家村榮純
率眾搗賊巢斬賊二百人奪獲鎗礮刀矛百餘件黃旗十餘竿

馬三十餘匹九月追賊至長沙戰賊洞井鋪殺賊十餘人擒一人遷沅州協陸司把總尋又戰賊蔡公墳河西都皆斬級以獻賊下竄追勦至武昌斬賊二級遂拔補鎮標千總鄖陽鎮總兵瞿騰龍奉檄援金陵榮純率湖南兵二百以從騰龍攻擊揚州敗瓜洲援賊復儀徵榮純皆有功四年二月三日率師隨騰龍搗瓜洲賊巢中伏騰龍遇害榮純手刃數賊殉焉奉

旨議卹如例子世職

謚壯節贈副將銜參將童添雲

童必發

增

童添雲字鎮銘長沙人生而多力能引三石弓精騎射入撫標

爲兵道光時洋夷犯順從提督果勇侯楊芳入粵一日賊攻城
急適有營兵在外欲調之入時火箭如雨射及城樓楊侯號於
諸軍曰孰能爲吾往者眾莫對添雲獨應曰願往卽持矛縋城
出不一時兵皆入城由是楊侯奇之給六品銜添雲善於知人
當賊圍長沙時官軍雲集添雲謂人曰吾愿觀諸軍中惟塔齊
布彭三元二人忠義奮發膽識過人將才也異日必建奇勳時
塔方任都司彭猶未秩耳添雲旣心契塔齊布會茶陵告警塔
齊布率師往援令添雲解送火藥限三日添雲踰宿卽至塔驚
其速答曰恐有失故星夜奔馳相助爲功耳由是塔亦心契添
雲湘潭之役弟必發戰死會添雲保陞守備人賀之添雲憤曰

何賀爲賊戕吾弟吾誓不與俱生雖官至一品所不願但願得賊首而甘心焉遂由湘潭轉戰至岳州十餘戰皆大捷斬馘無算擢都司再戰復武昌城遂擢以遊擊補用賞換花翎隨大軍下再擢參將添雲身長六尺面赤色額以下痘癍如錢目炯炯有光每橫矛陷陣鎗礮交轟不少卻賊見其旗輒驚曰童麻子至矣則皆奔四年十二月添雲率所部進攻九江城賊礮及其身袍袴穿千總某請收隊叱曰將軍不怕死怕死豈將軍乎有言退者斬益前進賊礮傷胸舁歸營八日而歿添雲善撫士卒賞賜無所吝雖身爲營將家無長物死後搜其營得敝簍二衣服外一無所有同營皆號哭失聲湖北巡撫胡林翼與塔齊

布尤惜之事 聞贈副將銜 賜祭葬附祀塔齊布祠 子諡

壯節 給世職

童必發添雲之弟 隨添雲入湖南撫標爲兵 咸豐四年夏參將

塔齊布率師剿賊湘潭時賊皆踞城外民房 一日塔齊布獨騎

率壯士數人入黃龍巷覘賊必發先驅巷狹而長塔甫入巷賊

數十人持矛突出數人者皆駭走賊直刺齊布必發急以背受

之中肩以狹故賊不能越齊布躍馬而逸必發遂遇害齊布甚

哀之葬諸潭地厚恤其家

主事諡勤勇贈副將銜參將彭三元

守備銜千總彭獻傑 把總劉碧山胡元則

彭三元字春浦善化人貌奇偉善技擊力能開三石弓補武庠生舉於鄉連成進士回湖南撫標試用期滿借補千總咸豐二年粵匪犯楚在籍大臣羅繞典治團防於長沙令三元募勇助剿圍解以守備歸本省遇缺卽補 賞戴藍翎三年在籍侍郎曾國藩復奉

命辦理團練檄寶慶府知府魁聯募寶勇千人分屬之寶慶協都司普承堯及三元各五百人適江西泰和土匪竄擾茶陵安仁隨同塔齊布剿平之擢都司明年隨塔齊布大破賊於湘潭換花翎師至巴陵又破賊於新墻於是寶勇敢戰之名著遠近攻武昌三元截洪山要隘斬馘甚多擢遊擊塔齊布與羅澤南

議分兩路進攻以湘勇過單命三元輔之九月復興國乘勝破
半壁山賊巢十月四日諸營盡焚南岸賊營明日賊連檣至三
元扼之江岸會塔齊布羅澤南俱至夾擊追至下遊上遊賊數
千舍舟登岸將乘虛襲澤南老營三元馳至截擊之賊揚帆上
駛復登岸三元沿江追擊澤南兵亦至賊敗竄溺死無算論功
進參將十一月大軍渡江進逼黃梅三元陳師橋西遏賊衝眾
師畢進賊卻三元遽踰橋從柵門躍入賊潰焚其營遂同復黃
梅移攻孔壠驛入賊土城擒僞丞相余福勝時湖廣總督楊需
已整軍進駐黃州於是大軍復渡南岸進攻九江塔齊布百計
攻城日與賊戰相持幾一年而三元戰績最多五年二月武昌

復陷八月塔齊布病歿軍次國藩自鄱湖水師馳至潯營奏令
周鳳山接辦潯防而以三元承堯兩軍副羅澤南回援武昌九
月復通城進師崇陽賊夜遁會湖南防兵敗於蒲圻羊樓崗退
保岳州澤南飭諸營移駐羊樓遏賊上犯獨率三元及湘副中
營官李杏春駐崇陽時僞總制楊萬年踞梯木山分擾壕頭堡
堡人請救三元杏春率所部勦之入山焚其巢將回軍翼逆石
達開前隊突至我師迎擊斬先鋒悍賊及回軍賊大隊復至三
元耳中礮流血滿襟戰益力次日賊益眾三元前戰賊自後火
我營三元勒馬回救格殺數賊並殺賊渠一人力竭墜馬遂遇
害時五年九月二十五日也事聞 贈副將銜 賜祭葬 予

諡勤勇 給世職附祀塔齊布祠三元忠勇識大體一子瑾光
從之營壕頭堡之戰有訛言瑾光陣亡者左右以告三元急止
之曰速擊賊無以吾子沮士氣督戰益急二十五日之戰將出
隊馬蹏齧三上三隊眾以爲不祥止之不可易馬而出先是有
旨命曾國藩舉堪勝總兵人員國藩以三元與楊載福薦以殉
難不果瑾光武生從三元軍中塔齊布愛其驍果有父風擢藍
翎守備中鄉試武舉人旋以疾卒於家

彭獻傑湘鄉人隨破田家鎮半壁山賊防保外委克復江西弋
陽廣信二城出力進千總加守備銜 賞戴藍翎當兵潰壕頭
時獻傑率中營三百人獨與賊力戰賊不敢逼營中火起執旗

衝入賊隊手刃數賊而死

劉碧山胡元則均湘鄉人藍翎把總與獻傑同充中營哨官各執哨旗前進被刺亡 加恩均從優議卹附祀塔齊布祠黃有慶號松亭善化人在三元營中襄辦營務累功敘藍翎縣丞壕頭堡之敗與同事文守煥皆殉守煥字有章善化文童

謚節愍贈副將銜遊擊銜湖南都司蕭捷三

蕭捷三字敏南武陵人武學生舉於鄉拔長沙協千總旋改授湘陰千總咸豐二年守省城出力以守備陞川四年二月黃州賊上竄陷湘陰吏議去職留營効力團防大臣曾國藩委令分帶水師進剿以功復職 賞戴藍翎旋補永綏營守備奉委援

武昌入月知府李孟羣議分水勇爲兩班捷三等率戰艦爲前班從中流飛駛直至鸚鵡洲復分兩翼抄繞而上與後班夾擊賊死無算二十二日西渡攻漢陽朝宗門土城捷三與遊擊楊載福等擲火毬焚賊舟盡燬賊輜重旋隨孟羣入漢焚口內船復武昌以都司升用 賞換花翎時餘賊尙據襄河國藩飭留水師於新灘口扼之二十四日賊舟千餘從襄河出犯水師迎擊敗之我師追及上游突有悍賊數舟擲火包撲營捷三頭面手足俱燬裹創追剿二十餘里嗣又敗賊蘄州釣魚臺骨牌磯等處破田家鎮抵九江湖口泊舟石鐘山麓是江西吳城戰船數百淪於賊賊實以砂石沉之以截江路僅留隘口攔以竹纜